



# Synfocity = 696

mail us at : [mzsynfo@gmail.com](mailto:mzsynfo@gmail.com); [mizoramsynod@gmail.com](mailto:mizoramsynod@gmail.com) - Phone - 2314648

August 2, 2018

## ☐ Zosap Rev. Alwyn Roberts (Pu Robert-a) kan chhân ta

Kan zosap Pu Robert-a (Rev Dr. Alwyn Roberts), kum 84 chu cancer natna avangin August 1, 2018 zing dar 2 khan Bangor Hospital-ah a boral. Pu Robert-a vui inkhawm hi August 13, 2018 (Thawhtanni) 1 p.m. khian a lawina kohhran Berea Newydd Chapel, Bangor-ah neih a ni ang a, hemi zawh hian thlanmualah (private burial) vuiliam a ni ang.

Pu Robert-a hi Pastor fapa a ni a, Wales rama Llanrwst khua-ah August 26, 1933 a piang a ni. Lehkathiam chhuanawm tak a ni a, Cambridge aṅanga M.A. zir chhuak ngat, chumi hnuah LLB zo leh a ni a, a thil zirna reng rengah Honours hmu veka tling chho a ni. Kum 1960 November thla khan Zoramah a lo chhuak a. Kohhran enkawl hna bakah Pachhunga Memorial College-ah Principal hna kum 7 chhung zet a thawk a. A taimain a thawhpuite'n an fak kher mai. Lehkhabu tha tak tak Sap ram leh a thianteho hnen aṅangin a chah khawm a, Library changtlung tak, hmarchhaka hriat hlawh tham a din hman a ni.

Zoram buai ṅan tirh lai khan ani chauh hi Zosap mipa a ni a. Buai zual lai khan Aizawl khawlaiah te mitthi ruang phum loh tam tak a awm hman a, chung chu ama hovin an thian fai a. A tlawmngaihzia hrechiantute chuan a chanchin hi hahipin an la sawi reng a ni. Dânhremi a ni bawk a, a huaisen hle, sipai laka mipui thawvanna turin nasa takin a bei a, silaia an lo tin pawhin an salai hmawr a nawr kiang a, a tih tur a thulh duh chuang ngai lo. Tin, buai kum khan Synod Moderator a ni a, Biak In luahtu sipaite pawh a um darh hlawm a ni.

May 20, 1967 khan an chhungkuain Zoram an chhuahsan a. Chumi hnuah pawh Pu Robert-a hian hna pawimawh tak tak a chelh kual a. Chanvo pawimawh eng emaw zat bakah BBC Board of Governors-ah member, BBC (Wales) Chairman leh Mental Health Commissioner nihna te a chelh kawp a ni. A thianu Pi Robert-i (Mair Powlands Roberts) kha Sap ram lama zirtirtu hna thawk thin a ni a, Zorama an awm chung khan Pi Teii Sikulah a thawk ve thin. Tin, an fapa neih chhun Zosanga (Hywel Glyn) pawh Dânhremi (Lawyer) a ni bawk.

## ☐ Synod Mission Board

◆ Kumin 2018 January aṅanga June thla thlenga Field hrang hranga ringthar neih dan report dawn chin hetiang hi a ni:

S.No	Field	Total	S.No	Field	Total
1.	Arunachal East	108	10.	Home Mission South	52
2.	Arunachal North	93	11.	Kolkata	610
3.	Arunachal West	69	12.	Lucknow	178
4.	Assam	33	13.	Nepal	54
5.	Barak	245	14.	Odisha	66
6.	Delhi	37	15.	Patna	67
7.	Jharkhand	213	16.	Siliguri	132
8.	Karbi Anglong	16	17.	Tripura	913
9.	Home Mission North	47	18.	Masihi Sangati	981
<b>TOTAL</b>					<b>3,914</b>

Mission Field hi region thum - Central region, North East region leh Home Mission-ah te then an ni a, heng bakah hian Field puitling lo, hma lakna lian tham zingah Masihi Sangati leh Cambodia te an awm a ni.

◆ Aug. 3 - 14, 2018 chhung hian Mission Field hrang hrang Jharkhand, Patna, Lucknow leh Delhi-ah te Field Committee turin Rev. K. Lalrinmawia, Secretary, Mission Board, Upa C. Lalngakliana leh Rev. Lalchhuanmawia, BEC member te an kal ang.

## ☐ MSSU

Aug. 4 & 5, 2018 chhung hian Phuaibuang Kohhranah Sunday School zirtirtu training neih a ni dawn a, training pein Rev. P.C Pachhunga, Executive Secretary, Upa Lalthahluna Ralte, MSSU Asst. Coordinator leh Upa Hrilthansanga, Mission Vengthlang, MSSU trainer te an kal ang.

## ☐ SL&PB

Aug. 3 - 5, 2018 chhung hian Baktawng Bialah Literature Seminar neih a ni dawn a, Upa H. Ronghaka, Additional Editor leh Upa R. Zolura, Board Member te an kal ang.

## ☐ Worship Deptt.

Aug. 1 - 4, 2018 chhung hian Tlabung Chawnpui Bialah Zai hruai training neih a ni a, Worship Deptt aṅangin Pu Lalromawia, Senior Instructor leh Pu H. Lalrinmawia, Instructor te an kal.

Contd...

☐ **Revival Deptt.**

August 7 - 11, 2018 chung hian Synod Revival Camping Center, Neibawihah a duh apiang tan Camping buatsaih leh a ni dawn a. Speaker tur chu Pu C. Lalzahawma, Hnehna Puangtu Team a ni ang. Camping Fee Rs. 100/- mi pakhat tan a ni a, Mut bu bakah Bible, Hla bu, Pen, Note bu ken tur a ni. Camp neihna hmun Neibawih-ah Chhun dar 11:00 atanga tlai dar 4 inkarah Registration tih fel vek tur a ni a, rokhawlhna lian tak nei an nih loh chuan tlai dar 4:00 hnu lamah in-register theih a ni lo ang. Tun tum camp-ah hian mawhphur turin Zonuam Pastor Bial ruat an ni.

☐ **Campus Ministry**

July 26, 2018 (Ningani) khan Govt. Aizawl West College-ah hun an hmang a. Director Rev. Lalchungnunga 'n hun hmangin 'Ringtuten he khawvelah nun dan kan thiam a, engtia khawsak tur nge tih kan hriat theihna tura pawimawh Life Skills chungchang' a sawi a ni.

July 27, 2018 (Zirtawpni) khan Govt. T. Romana College, Republic-ah leh MFM Institute of Nursing, Bawngkawnah te hun an hmang a. Hengah te hian Director Rev. Lalchungnunga 'n hun hmangin 'Tirhkoh Paula'n Timothea hnena Pathian chungte khawsak dan tur a sawi hmangin, he khawvelah ringtute awmze nei zawka kan nun dan tur te' a sawi.

July 31, 2018 (Thawhlehi) khan Govt. Aizawl College-ah hun an hmang leh a. Director Rev. Lalchungnunga 'n hun hmangin zirlaite ngenna angin 'Tawpna chungchang - Mi thianghlim lawr, kum sang rorel chungchangah te Bible study neihpui an ni.

☐ **Synod-in chhawmdawlna pe**

Tun hnaia harsatna hrang hrang neite hnenah Synod Relief Fund atangin chhawmdawlna hetiang hian pek an ni.

S.No	Khua	Pek chhan	Chhungkaw zat	Chhawmdawlna pek zat
1.	Melriat	Kangmei tuar	2	Rs. 12,000/-
2.	Falkawn Hmarveng	Kangmei tuar	1	Rs. 10,000/-
3.	Hunthar	Leimin tuar	1	Rs. 10,000/-
4.	Chhungte	Leimin tuar	1	Rs. 10,000/-
5.	Tawizo	Leimin tuar	1	Rs. 10,000/-
6.	Tawizo	Damlo	1	Rs. 8,000/-
7.	Darlawng	Damlo	1	Rs. 8,000/-
			<b>TOTAL</b>	<b>Rs. 68,000/-</b>

☐ **Prison Ministry**

Prison Ministry hmalakna kal zelah kar tin Nilaini leh Zirtawpni apiangin District Jail, Armed Vengah leh Central Jail-ah te Counselling Class neih thin a ni.

☐ **Zin**

July 30 - Aug. 3, 2018 chung hian Shillong-ah PCI Executive Committee neih a ni a, PCI Moderator Rev. Lalramliana Pachuau, Rev. H. Remthanga, Synod Finance Officer, Rev. K. Lalrinmawia, Secretary, SMB leh Committee member-te Rev. Dr. Lalchhuanliana, Rev. C. Rosiama, Rev. Dr. Lalhmangaiha, Upa R. Lalmalsawma, , Rev. Rualthankhuma leh Rev. Dr. P.R. Hmuaka te an kal.

☐ **Hruaina Eng FM Radio**

♦ **AUGUST 3, 2018 (FM Zoawi Aizawl & FM Lunglei @ 7:30 p.m.):**

SOLO : Zorinsanga Sailo - Fak leh dil hun lawmawm ah hian, ZAIPAWL : Kulikawn Pastor Bial Zaipawl - An puang zel dawn, THUSAWI : John Lalhruaitluanga - Thianghlimna, SOLO : Lalthawhpuii - Lal i ni, ZAIPAWL : Mizoram Synod Choir - Ka lawm e Lalpa

☐ **Hruaina Eng TV Programme**

**Susamachar Prasaran Programme**

♦ **AUGUST 5, 2018 (Pathianni) 5:00 pm. :**

Group/Choir/Solo : Hamren Pastorate Choir - Vang thu tha, Group/Choir/Solo : Chhinga Vengthlang - Gate he, Sermon : Rev. P.S. Daniel - Babostha ebong dharmikts, Group/Choir/Solo : P.C. Lianhmingthanga (Valpuia) & Lalzawni - Jhum Jhum, Group/Choir/Solo : Aizawl West Area Choir - Bharat Desh Mahan

♦ **AUGUST 5, 2018 (Tv Programme) @ 4:00 - 6:00, 8:00 - 9:00 p.m) :**

Weekly Round Up,  
Sermon : Upa Dr. H. Vanlalhluna - Rorelna hi Lalpa ta a ni,  
Pu Lalromawia - Pathian biak inkhawma zai hruai dan